

Ho Arolelana Lentsoe



SABATHA THAPAMA

Bakeng sa Boithuto ba Beke Ena Bala:

Lipes. 119:105, Jer. 23:29, Baheb. 1:1-3, 2 Tim. 3:14-17, 1 Johanne 1:7-9, Moek. 3:1, 2 Tim. 4:2.

Teman'a Khopolo:

“Ho lutse joalo le lentsoe la ka le tsoang molomong oa ka: le ke ke la khutlela ho ‘na le le feela, empa le tla tsebetsa se ratoang ke ‘na, le phethe seo ke le romeletseng sona” (Esaia 55:11).

Ha re paka, re bua ka Jesu. Empa re ne re tla tseba eng ka Jesu ha Bible e ne e le sieo? Hantle-ntle, re ne re ka tseba ha kae ka ntoa e kholo, lerato la Molimo, tlhaho, bophelo, le fu, tsoho, le ho khutla ha Morena oa rona haeba re ne re se na Mangolo? Leha tlhaho e senola borena le matla a Molimo, ha e senole leano la pholoho. Jesu, ka Moea o Halalelang, ke “leseli la ‘nete le bonesetsang motho e mong le e mong ea hlahang lefatšeng” (Johanne 1:9). Leha ho le joalo, kantle ho Lentsoe la Molimo hore le hlalose ‘nete e halalelang, tšenolo ea Moea o Halalelang lipelong tsa rona e na khaello. Lentsoe la Molimo le ngotsoeng ke tšenolo e hlakileng hape e tletseng ka ho fetisisa ea Jesu, Lentsoe le Phelang. Leha baetapele ba borapeli ba ne ba ithuta Lentsoe la Molimo, bongata ba bona ba ne ba fosa molaetsa oa mathomo. Jesu a re: “Le botsisisa mangolo, ka hobane le lekanya hore le na le bophelo bo sa feleng ho ‘ona; athe ke ‘ona a mpakang” (Johanne 5:39). Thuto e ‘ngoe le e ‘ngoe ea Bible ha e utloisisoa hantle e bontša botle ba semelo sa Jesu. Ha re arolelana Lentsoe la Molimo, sepheo sa rona sa mathomo ha se ho bontša hore re nepile le hore motho e mong o fositse; ke ho senola Jesu leseling le leng le le leng la ‘nete leo re le arolelanang.

**Ithute thuto ea beke ena ho lokisetsa Sabatha sa la 15 Phato.*

Matšoao a Lentsoe la Molimo

Bala Lipesalema 119:105, Jeremia 23:29, Luka 8:11, le Mattheu 4:4. Ke matšoao a fe a mahlano a sebelisitsoeng ho hlalosa Lentsoe la Molimo litemaneng tsee? U nahana matšoao aa a mahlano a khethiloe hobaneng ho emela Lentsoe la Molimo?

Matšoao a fapaneng a sebelisitsoeng litemaneng tsena a hlalosa mesebetsi ea mathomo ea Lentsoe la Molimo. Ha re arolelana Mangolo le ba bang, hoba joalo ka leseli le bonesang bophelo. Jesu, “leseli la lefatše,” o phunyelletsa har’a lefifi la ho hloka kutloisiso ha bona ka Molimo le ka semelo sa Hae. Likelello tse fifalitsong ke ho hloka kutloisiso ea Molimo li bonesetsoa ke Moea o Halalelang ka Lentsoe la Molimo.

Ho ea ka Jeremia, Lentsoe la Molimo le joalo ka mollo le hamore. Le metsa manya a sebe bophelong ba rona e be le thuha lipelo tse thata. Ha re thusa batho ho bona khanya ea Jesu Lengolong, lipelo tsa bona tse thata lia thubeha, e be mollo oa lerato la Hae o metsa manya a boikhabo, meharo, takatso, le boinahanelo.

Hape Lentsoe la Molimo le tšoantšoa le peo. Semelo sa peo ke hore e fana ka bophelo. Peo e nka nako ho hola. Ha se lipeo tsohle tse melang ka nako e tšoanang. Ha se limela tsohle tse holang ka sekhahla se lekanang. Empa tlas’a maemo a lokileng, bophelo bo peong bo phunyelletsa mobu ho qala bophelo bo bocha. Ha re jala peo ea Lentsoe la Molimo ka lipelong le likelellong tsa ba bang, ha re ka ke ra bona litholoana hang hang kamehla, empa peo e ntse e hola ka ho khutsa, ‘me ka nako ea Molimo, haeba ba mamela qeko ea Moea o Halalelang, e tla hlahisa kotulo bakeng sa ‘muso oa Molimo.

Jesu o tšoantša lentsoe la Hae le bohobe bo matlafatsang. Lentsoe la Molimo le khorisa tlala ea moea e be le matlafatsa takatso ea moea e kahare. Ha u arolelana litšepiso tsa Lentsoe le ba bang ‘me u ba thusa ho fumana hore Jesu ke Eena Lentsoe, maphelo a bona a tla fetoloa ke molemo oa Hae, a khahloe ke lerato la Hae, a makatsoe ke mohau oa Hae, ‘me a khotsafatsoe ke boteng ba Hae.

Nahana hape, ka linnete tseo re li tsebileng ka Biblele feela. Hoo ho lokela ho re ruta eng ka hore na re loketse ho le boloka seo le re rutang sona e le sa bohlokoa ha kae?

Matla a Pōpo a Lentsoe la Molimo

Bapisa Baheberu 1:1–3, Baheberu 4:12, le Lipesalema 33:6, 9. Litemana tsee li re bolella eng ka matla a Lentsoe la Molimo?

Lentsoe la Molimo ke lentsoe le phelang. Ho lona le na le matla a ho fihlela lintho tseo le li phatlalatsang. Mantsoe a motho a ka bua ka se leng teng, empa Molimo o bua ka lintho tse e-so etsuoe e be o li etsa ka matla a lentsoe la Hae. Lentsoe la Molimo ke lentsoe le bopang. Lentsoe le utloahalang le tsoang molomong oa Hae le na le matla a ho hlola lintho tsohle tseo a li phatlalatsang. Paleng ea Tlholeho ea Genese 1, poleloana “Molimo oa re” e sebelisoa ka makhetlo (Gen. 1:3, 6, 11, 14, 20, 24, 26, 29). Mantsoe a phatlalatso a Molimo a ne a na le matla a mangata hoo e neng e re ha a bua, ha hlaha sebaka se ommeng, limela tsa mela, lipalesa tsa thunya, lifate tsa litholoana tsa kiba-kiba, le liphoofole tsa thala. Ho na le lentsoe la se-Heberu le thahasellisang le sebelisitsoeng ho Genese ho hlalosa tšebetso ea Molimo ea tlholeho. Lentsoe leo ke bara. Boemong bona ka ho khetholoha, le sebelisitsoe ho hlalosa ketso ea Molimo ea ho hlola letho ka se sieo. Leetsi lena le sebelisitsoe feela moo ho buuoang ka Molimo. Ke hore, ke Molimo feela o ka etsang bara, ‘me o etsa joalo ka matla a lentsoe la Hae le buuoeng.

Molimo ha oa hlola lefatše lena feela ka matla a lentsoe la Hae, empa o boetse o le tšehelitse le ho le tiisa ka lentsoe lona leo la Hae. Matla a tšoanang a lentsoeng la Molimo le buuoeng a teng le lentsoeng le ngotsoeng. Oona Moea o Halalelang o neng o sebetsa Tlhohong o ne o boetse o sebetsa ho susumetsa Lengolo. O teng ha re bala Bibeletse kapa re e arolelana le ba bang. Ho na le matla a fana ka bophelo, a fetolang bophelo, a popo Lentsoeng la Molimo. “Matla a popo a buileng hore mafatše a be teng a lentsoeng la Molimo. Lentsoe lena le fana ka matla; le tiisa bophelo. Taelo e ‘ngoe le e ‘ngoe ke tšepiso; ha le amohetsoe ke kelello, le amohetsoe moeeng, le tla le bophelo ba Rabosafeleng. Le fetola sebopelo hape le bope bocha moea hore o tšoane le setšoantšo sa Molimo.”—Ellen G. White, Education, leq. 126. Ha re itšoareletsa ka litšepiso tse fumanehang Lentsoeng la Molimo, maphelo a rona a fetoha, ‘me ha re thusa ba bang ho itšoareletsa ka litšepiso tse na tse makatsang, le bona Moea o Halalelang o tla fetola maphelo a bona.

Nahana: Molimo o ile a bua ha etsahala. Ke joang re ka tšoarang na see se bolela’ng? taba ee e makatsang e re bolella eng ka matla a Hae? Hobaneng ha ‘nete ee ea matla a Molimo a popo e lokela ho ba khotatso ho rona?

Melemo ea ho Ithuta Lentsoe la Molimo

Ho na le melemo e mengata ea ho ithuta Lentsoe la Molimo. Moapostola Petrose o re bolella hore ka litšepiso tsa Lengolo re “fuo a lefa le sa boleng” (2 Pet. 1:4). Jakobo o bua ka “Lentsoe le hlomiloeng ka ho lona, le tsebang ho boloka meea ea lona” (Jakobo 1:21). Pauluse o eketsa ka hore ““Lentsoe la mohau oa Oona . . . [le na] le matla aho le hahisa, le ho le nea lefa hammoho le bahalaleli bohle”” (Liketso 20:32). Bible e na le morero oa topollo. Ha re bona Jesu hohle kahare ho Lengolo rea fetoha. Ha re mo bona Lentsoeng la Hae, e tsoana le Eena (2 Bakor. 3:18). “Ke molao ho bohla ba kelello le moeeng ka bobeli hore ka ho talima rea fetoha. Butle-butle kelello e ikamahanya le lintho tseo e lumelloang ho tsepama ho eona.”—Ellen G. White, *The Great Controversy*, leq. 555.

Bala 2 Timothea 3:14–17 le Johanne 17:14–17. Ke melemo e fe e meng e fumanehang ho baleng Lentsoe la Molimo?

Ha a ngolla mphato oa hae ea monyenyanane Timothea, moapostola Pauluse o mo khothaletsa ho tšepahalla Lengolo ‘me o mo arolela melemo ea ho ithuta Lentsoe le bululetsoeng. Ho latela Pauluse, Bible e “na le molemo oa ho ruta.” E senola ‘nete e pepese leshano. E hlalosa leano la Molimo bakeng sa leloko la botho. E khalema libe tsa rona, e lokisa mehopolo ea rona e khelohileng, ‘me e re laela ka ho loka. Mangolo a senola ho loka ha Krete. A re holla phosong ea boetsalibe ba rona ho re isa botleng ba ho loka ha Hae. Ha re bona lerato la Jesu le se nang boikhabo khahlanong le boichebo , rea hlolloa. Ha re bona botebo ba lereko le tsotello ea Hae Lengolong, maphelo a rona a ea fetoha. Ha re arolelana lentsoe la Hae le ba bang, le bona, ba ea fetoha. Ha re bona Jesu lentsoeng la Hae, re eketsa ho tsoana le Eena. Ho paka ha se ho arolelana ka seo re se nahanang kapa seo re se lumelang. Ke taba ea ho arolelana linnete tsa bosafeleng tse fumanehang Lentsoeng la Molimo. Ha Lentsoe la Molimo le hlhlonolofalitse maphelo a rona ka khaphatseho, re na le sebete sa ho bolella ba bang kamoo le ka hlhlonolofatsang maphelo a bona le bona.

Nahana ka nako ea maima eo u kileng oa tobana le eona le kamoo Lentsoe la Molimo le ileng la fetoha matla a hau kateng. U ile oa ithuta eng boiphihlelong boo?

Ho Sebelisa Lentsoe la Molimo

Motho e mong o balile litšepiso tse fetang tse likete tse tharo Lentsoeng la Molimo. Tšepiso ka 'ngoe e tsoa pelong ea Molimo o lerato o "ka tsebang, ka matla a hae a sebetsang ho rona, ho etsa ho fetisang haholo tsohle tsee re ka li qelang le tsee re ka li hopolang" (Baef. 3:20). Litšepiso tsa Molimo ke boitlamo ba Hae boo a bo etsatsang e mong le e mong oa rona. Ha re kopa litšepiso tsena ka tumelo 'me re ruta batho ba bang ho li kopa, mahlohonolo a leholimo a phalla ho kena maphelong a rona. Moapostola Pauluse o tiisa taba ena ea leholimo ho Baroma 8: "O'na o sa kang oa qenehela Mora oa oona oa sebele, oa mpa oa mo tella rona bohle, na o ke ke oa re sita ka lintho tsohle le eena na?" (Baroma 8:32). Moapostola Petrose o hlakisa tšepiso ena, a phatlalatsa hore, "Ha e le moo matla a hae, e leng matla a Molimo, a re neile lintho tsohle tseo e leng tsa bophelo le tsa borapeli, ka tsebo ea Ea re bitsitseng ka khanya le ka matla a hae"(2 Pet. 1:3). Ka lefu la Krete sefapanong, le tlhoko ea Hae holim'a Satane le makhotla le matla a lihele, o e file tsohle tseo re li hlokanng ho phela bophelo ba moea ka khalalelo. O boetse o tšepisa ho re fa lithoko tsa rona tsa nama.

Bapisa 1 Johanne 1:7–9 le Bafilipi 4:13, 19. Leha litšepiso tsena li fapane haholo, li re ruta eng ka semelo sa Molimo? Litšepiso tsee li amme maphelo a rona joang?

Litšepiso tseo re li balileng litemaneng tsena li bua lintho tse fapaneng ka bo 'ngoe ba tsona, empa setšoantšo sa Molimo seo li re fang sona se tšoana haholo. Li senola Molimo o lerato le tšoarello, matla 'ohle, hape o tsotellang lithoko tsa rona tsa mantlha. Li re fa tiisetso ea hore Molimo o re tsotella ka botebo.

Bala Baheberu 3:19; 4:1–3; le Mattheu 13:58. Litemana tsee li re bolella eng ka tlhokahalo ea tumelo?

Ka Bibeleng ho na le litšepiso tse monate tsa Molimo, 'me haeba ka tumelo re kopa litšepiso tsena tsa Lentsoe la Molimo ka tumelo 'me re li lumela hobane Krete a re tšepisitse, litšepiso tseo e ba tsa rona. Ke ho hloka tumelo ho bokhoni ba Molimo ba ho phethahatsa seo a se tšepisitseng lentsoeng la Hae ho kotelang phethahatso ea litšepiso tsa Molimo maphelong a rona. Rapela hore bekeng ena Molimo o ke o u tataisetse ho e mong ea hlokanng litšepiso tse tletseng tšepo tse fumanehang Lentsoeng la Molimo.

Ho Arolelana Lentsoe

Litaba tse monate lia arolelana. Nahana ka linako tseo bophelong ba hau u neng u thabisitsoe ke litaba tse monate. Mohlomong e ka ba letsatsi leo o neng o behellelitsoe lenyalo, tlhaho ea ngoana, mosebetsi o mocha, kapa ho reka koloi e ncha kapa ntlo. U ne u thabile ho u sitoang le ho itsoara u batla ho li fetisa. Ke taba e monate ho arolelana thabo ea rona le ba bang, empa litaba tse monate ka ho fetisisa tlhohlong eohle ke pale ea Jesu. Ha re fumana temoho tse ncha lentsoeng la Hae ka pholoho e leng teng ho Krete, thabo ea lipelo tsa rona ea khaphatseha, ‘me re lakatsa ho bolella motho e mong osele. Ha baetapele ba borapeli ba leka ho hanela bapostola ho ruta, Petrose a phatlalatsa hore, “‘Hobane ha e le rona, ha ho kamoo re ka lesang kateng, ho bolela tseo re li boneng le tseo re li utloileng’” (Liketso 4:20).

“Hang feela hore motho a tsoaloe ho Krete ho mela ka pelong ea hae takatso ea ho tsebisa ba bang ka motsalle oa bohlokoa eo a mo fumaneng ho Jesu; ‘nete e bolokang, e halaletsang ha e ka ke ea bolokoa ka pelong. Haeba re apesitsoe ho loka ha Krete ‘me re tletse thabo ea Moea oa Hae o lulang kahare ho rona, ha re ka ke ra khutsa.’”—Ellen G. White, *Steps to Christ*, leq. 78. Ho Baroma 1:14–16, Pauluse o ngotse hore: “Ke molato ho ba-Gerike le ho babarebare, ho ba bohlahe le ho ba maoatla. ‘Me joale, ha e le ka ‘na, ke itokisitse ho bolela Evangeli, hobane ke matla a Molimo a ho pholosa mang le mang ea lumelang, mo-Juda pele, le eena mo-Gerike.”

Moapostola Pauluse o ne a sa khathale ke ho pheta pale ea tšokoloho ea hae. Thabo ea pale ea hae e ne e khaphatseha ke Jesu. Ho eena litaba tse monate li ne li arolelana, kahona o ne a sitoa ho khutsa.

Esaia 50:4, Moeklesia 3:1, le 2 Timothea 4:2 li re fa litšiea li fe tsa bohlokoa tsa ho arolelana Lentsoe la Molimo?

Ha re neelana ka maphelo a rona ho Krete le mosebetsi oa Hae, o tla re bulela menyetla ho re re “bue nako ha e tsoaneleha leha e sa tsoanelehe” kapa ka nako e tsoanelehang ho bao a butsenseng lipelo tsa bona. Ho pakeng hohle ha rona, re lokela ho boloka litšiea tse tharo tsa Bible ka likelellong: seo re se bolelang, kamoo re se bolelang kateng, le nako eo re se bolelang ka eona.

Ke batho ba fe bao u ntseng u kopana le bona, ‘me ke joang u ka bang paki e molemo ho fetisa ho bona?

Ho Ithuta Haholoanyane:

Bala Ellen G. White, “A Knowledge of God,” maq. 87–91, ho *Steps to Christ*; “Bible Readings With Families,” maq. 192–193, ho *Gospel Workers*; le “Bible Work Techniques,” maq. 481–486, ho *Evangelism*. Molimo o ntse a sebetsa lipelong ka mahlakoreng ohle ho rona. Haeba re na le temoho ea moea ho bona moo Molimo o s’o nts’o sebetsa, kamehla re tla besa mohloane ho bona menyetla ea ho arolelana lentsoe la Molimo le ba bang. Ha Molimo o ntse o lokisa mobu oa pelo, re na le monyetla oa ho jala peo ea evangeli. Moea o Halalelang o ile oa lokisa pelo ea Nikodema, mosali selibeng, mosali ea neng a na le phallo ea mali, sesenyi sefapanong, molaoli oa ba lekholo oa mo-Roma, le ba bang ba bangata le pele Jesu a ka teana le bona. Ka liketsahalo tsa maphelo a bona le kamo ea Moea o Halalelang, ba ne ba itokiselitse ho amohela molaetsa oa Kreste. Ka tlhaho re ka ba lekhoneho kopa batho hore na re ka ba rapella, ra arolelana le bona tšepiso ea Bible, kapa ra ba fa pampitšana ea sengoloa. Hangata ho feta hanyane ha re ikutloa re na le boikutlo ba ho arolelana tumelo ea rona le motho e mong, ke hobane Moea o Halalelang o re ammeng o se o ntse o amme motho eo hore a amohele bopaki ba rona.

Lipotso tsa Puisano:

1. Haeba motho e mong a ka tla ho uena a ikutloa a le molato haholo ka taba e ‘ngoe joale a hloka tšoarelo ea Molimo, u ka mo fa keletso e fe, ‘me u ka mo arolela litemana li fe tsa Bible? Uena boiphihlelo ba hau ke bo fe le ho ikutloa molato le matla a Molimo a ho tšoarela bophelong ba hau?
2. Ka nako tse ling Molimo o tlisa batho maphelong a rona hobane o lakatsa ha ba ka tseba ‘nete. Ke joang re ka bang hlokolosi tataisong ea Molimo?
3. Tsepama haholo ho matla a Molimo le Lentsoe la Molimo joalo ka ha a senlehile paleng ea Tlholeho le Tlhohong ka boena. Re sitoa le ho utloisisa botlalo ba tlhohleho ka bobona hobane bo pharaletse haholo. Joale e be re nahana hore ho lokela e be Molimo ea e hlotseng o moholo ho feta seo a se hlotseng. Re ka fumana khotatso joang ka ho tseba hore Molimo oo re o sebeletsang o matla haholo joalo? ‘Me ha a matla haholo feela, empa le rona oa re rata. Re ka fumana tšepo e fe e kholo ka lebaka la ho tseba litaba tsee ka Molimo? ‘Me tsebo ee e ka re thusa joang ho paka ka tsela e ntlafetseng ho feta ka Eena?